



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

**Maldives nung Opposition party tongtibai
tir Muizzu agintsü asoshi benoktsü**

**ISSF World Cup: Divyansh Singh
Panwar-i gold medal nuogo**



VOL. XXI ISSUE NO. 107 (ADOK 107) DIMAPUR

SANGTENNÜ (TUESDAY)

ANJETI (JANUARY) 30, 2024 ₹ 5.00

Feb 27 nü Rajya Sabha Election agitsü

New Delhi, January 29, 2024 (Agencies): Election Commission of India (ECI)-i February 27 nü state 15 nung Rajya Sabha menden 56 atema election agitsü osang metetdaksüogo.

ECI-isa February 15 tashi nung nomination papers agütsütsü metetdaksü.

Rajya Sabha menden teimtiba Uttar Pradesh nung lir aser iba state nung menden 10 atema election agitsü. Parnok sülen Bihar aser Maharashtra nung menden tokrok lir.

Maneni West Bengal aser Madhya Pradesh nung menden pungugu aser Karnataka nung

menden 4 atema election agitsü. Telangana, Andhra Pradesh, Odisha aser Rajasthan nung menden asemsem aser Chhattisgarh, Haryana, Himachal Pradesh o Uttarakhand nung menden kaka atema election agitsü.

February 27 anepdang 9:00 ako nungi nikongdang 4:00 ako tsüngda elections agitsü aser kasa anogo nungsa votes azüngtsü.

Odisha aser Rajasthan dak alaka tanga state tem indang Rajya Sabha kümsük April 2, 2024 nü tembangtsü. Odisha aser Rajasthan MP tem kümsük April 3, 2024 nü atemtsü.

NH -61 (New NH 02) nung lung poksatsü: Mkg DC

Dimapur, January 29, 2024 (TYO): January 31, 2024 nü NH -61(New NH 02) Angetyongpang Tzu River nung DEF Police Church nungi Yisemyong tsüngda lung poksatsü.

Iba mapa atema JKM Infra Works Guwahati Assam nem temelaba agütsüogo aser nikongdang 3:00 ako nungi aonung 8:00 ako tsüngda lung poksatsü ta Mokochung Deputy

Commissioner Thsuvisie Phoji-i ashi.

Iba mapang Conductor-i lenmang nung senzür taküm aser rongsen kümsüka ayutsüsa mapa inyaksü. Külén Company-ia Explosives Act/Rule, 2008 nung lateta aliba ama inyaksü aser taküm mesüra rongsen dak takoksa ajurura JKM Infra Works-i iba tebilemtsü abentsü DC Phoji-isa metetdaksü.

Modi-i kokra joko elections malitsü: Kharge

New Delhi, January 29, 2024 (Agencies): 2024 nung Prime Minister Narendra Modi-i sorkar akümtsü tashi ngura tarutsü nung elections malitsü ta Congress President Mallikarjun Kharge-i ashi.

Bhubaneswar nung "Odisha Bachao Samavesh" rally nung jembidang pai iba ya ashi.

"Joko elections malitsü. Pai elections melidaksütsü aser dictatorship arutsü. Asenoki vote asütsüba iba ya tatembangba maongka lir. Iba sülen voting maparen alitsü. Iba sülenbo Russian President

(Vladimir) Putin-i inyakba ama elections agia aotsü" ta Kharge-i ashi.

"Yashi parnoki INDIA alliance nung ono k den yariteper ka anir aoba nguogo. Parnok nisung ajak nem notice agütsür, amokmerener. Nenoki iba tesentaktep mepilara onoki nenok repranga atatsü ta parnoki ashir" ta Kharge-isa ashi.

"Tetsübu agi nisung kari party toktsür, kari teloktep toktsür. Item ama lapitem dang süra kodaser linük liteta aotsü. Constitution aser democracy samatsü" ta paisa ashi.

Feb 5 nü lannir aikati Congress toktsütsü

Guwahati, January 29, 2024 (Agencies): Congress lannir aikati February 5 nü party toktsütsü ta Assam cabinet minister Pijush Hazarika-i ashi.

Taoba Assam Youth Congress president Ankita Dutta aser taoba Congress MLA Bismita Gogoi nati BJP nung adenba sülen anogo ka lir pai iba osang metetdaksü.

"February 5 nü Congress lannir aikati party toktsütsü. Anogoshia nisungtemi ozü party nung züngsem akümtsü asüngdang. Ni mapang ka Congress party samatsütsü ta ashidang parnoki ni aitsü. Tang ibaji ataloker aser maneni ataloka aotsü" ta Minister Hazarika-i ashi.

"Himanta Biswa Sarma-i state atema inyaker aser Narendra Modi-i linük atema inyaker. Nisungtem onok meimer aser opposition party lannirtemia onok meimtsüsa akümer aser BJP nung adener anungji iba inyakyim maneni aotsü" ta pai ashi.

Lok Sabha elections jakdang Ankita Dutta aser Bismita Gogoi na adenba ajanga BJP jenjang tajungba kumogo. Tena den külemi taoba AASU president Dipanka Nath aser taoba AASU vice-president Prakash Das na BJP nung aden.

Maneni, taoba Aam Aadmi Party (AAP) lannir Kamal Kumar Medhi-ia BJP nung adentsü sentong lir.

MoS Dr. Munjpara Mahendrabhai-i Phek district semdang



Union Minister of State Dr. Munjpara Mahendrabhai den Ayush Doctor tem agiba noksa angur.

Phek, January 29, 2024 (DIPR): Union Minister of State for Women & Child Development & Ayush Dr. Munjpara Mahendrabhai-i January 26 aser 27, 2024 anogotem Phek semdangogo.

January 26, 2024 nü DPDB Hall, Phek nung Dr. Munjpara-i pa Ministry kübok inyakba ketdangsurtem den senden ka amen. Iba senden nung Phek DC Kuko Mero, NCS menden liasü.

Pa Ministry kübok Centrally Sponsored Schemes inyakba osang tejangja metetsü atema pai Nagaland semdang ta Dr. Munjpara-i ashi.

Anganwadi and Ayush Health & Wellness Centres aser One

Stop Centres nung electricity, toilets, wifi aser water supply shitak alitsüla ta paisa ketdangsurtem dang ashi.

Senden nung District Project Officer (ICPS/Integrated Child Protection Schemes) Abeiu Pezeyie, Centre Administrator for Sakhi-One Stop Centre G. Tsaisa Nyusou aser District Child Protection Officer Povezo Puro nung den Social Welfare department kübok ketdangsurtem aden.

Senden nung Deputy Director, Ayush Dr. Bendangtula-i PowerPoint presentation ka nung Ayush Hospital maparen osang lemsatop.

Nagaland nung ketdangsurtemisa Union Minister

of State den khuretem lemsatop aser office buildings yangluba den maparen shitak inyaka aotsü atema mapang shitak nung senotsü agütsütsü mepishi.

Dr. Munjpara Mahendrabhai-i January 27 nü Sohomi village nung Ayush Health & Angawati Centres semdanga liasü.

Pa ya Cardiologist ka lir aser District Hospital Phek semdang Medical Surgeon Dr. T. Ezung lia heart patients ana yari.

January 27 nü DPDB Hall, Phek nungsa Dr. Munjpara-i Ayush Doctors, Asha aser Angawadi workers den sendentem amen. Paisa VCCs, VDB Secretaries aser Village Head GBs den sendentem amen.

BJP MP kati India ajungalen CAA tenzüksü metetdaksü

Kolkata, January 29, 2024 (Agencies): Taruba anogo 7 tsüngda India ajungalen Citizenship (Amendment) Act (CAA) tenzüksü ta Union Minister aser BJP lannir Shantanu Thakur-i ashi.

West Bengal kübok South 24 Parganas district nung lokti sentong ka nung jembidang "Ayodhya nung Ram Mandir lapokogo aser taruba anogo tenet tsüngda West Bengal nung dang masü saka India ajungalen CAA tenzüksü" ta Takhur-i ashi.

Indian Parliament-i 2020 küm CAA agizük aser iba ajanga December 31, 2014 matongdang Afghanistan, Pakistan aser Bangladesh nungi India nung arua jenokba non-Muslim nung nem senso agütsütsü.

Linük asem nung tamangba yimsü tsütsü reshikangshi ajuruba Hindu, Sikh, Buddhist, Jain, Parsi aser Christian tem yaritsü atema CAA yanglu.

Shantanu Thakur ya All India Matua Mahasangha president lir aser Bongaon Lok Sabha MP lir. Pai CAA mapa tenzüksü atema kanga jembia arur.

Par constituency nung Matua

nung aika lir aser parnok ya East Pakistan (Bangladesh) nungi aruba Dalit nung lir. 1947 küm India o Pakistan lemdangba aser 1971 Bangladesh Liberation War sülen parnok India-i aru.

2019 Lok Sabha aser 2021 state assembly tem nung Matua aser tanga Dalit nungeri BJP pusema nungitogo.

Centre sorkari CAA atema temzüng ya March 2024 tashi nung renemtsü ta shiogo anungji Shantanu Thakur-i CAA tenzüksü ta ashiba mapang den puteper.

Trinamool Congress party-ibo CAA magizüker aser iba ya

temzüngi memelar ta ashi. Ajisüaka BJP-i 2024 Lok Sabha elections nung rangloker CAA mapa tenzüksü meranger.

North East Students' Organisation (NESO)-i December 11 anogo ya Citizenship (Amendment) Act anema 'Black Day' sangdongogo. Rajya Sabha-i December 11, 2019 nü Citizenship (Amendment) Bill agizükba ajanga NESO-i iba sangdong agütsü.

Parliament nung Bill agizükba sülen December 2019 nung Northeast ajungalen nübertemi CAA anema lungkak ait.

AJYCP-i CAA agientsü, ILP tenzüksü akhanger

Guwahati, January 29, 2024 (Agencies): Assam Jatiyabadi Yuva Chatra Parishad (AJYCP)-i Citizenship Amendment Act (CAA) agientsü atema takhangba agütsü.

AJYCP-isa Assam nung inner line permit (ILP) system tenzüksü akhanger.

AJYCP-i Hombarnü Guwahati nung lungkak aitba sentong tulu ka ayonga agidang item takhangbatem agütsü.

AJYCP züngsemtem den tanga telok balala züngsemtemi Guwahati kübok Chachal nung lungkak aitba sentong agia liasü.

Parnoki Assam chief minister Himanta Biswa Sarma, state sorkar aser Centre anema yimiyimtem ayima lungkak ait.

Centre-i CAA magienra aser Assam nung ILP metenzükra parnoki tarutsü nung sentong tuluba ayonga agitsü ta AJYCP-isa metetdaksü.

Dimapur DPDB senden Jan 29 nü menogo



Advisor aser DPDB Dimapur mendenbuba-i January 29 nü DPDB senden amenba mapang o jembidang tangokba noksa nung angur.

Dimapur, Aenjeti/January 29 (TYO): Ita shia amenba Dimapurn District Planning and Development Board (DPDB) senden January 29 nü Deputy Commissioner Dimapur conference Hall nung menogo. Iba senden ya Advisor, Labour and Employment & Skill Development, Excise aser Chairman DPDB Dimapur, Moatoshi Longkumer lenisüba nung mena liasü. Senden nung DC Dimapur, Dr. Tinojongshi Chang-i MLA Moatoshi aser Hekani Jakhalu na pelashishia agizük aser Dimapur DPDB senden nung adentsü atema mapang agütsüba atema tena dang kanga pelaba lemsatepa liasü. DPDB züngsemtem den jembiba mapang DC-isa,

parnok dang district temaba jenjangi ajungketsü atema pei tata mapang tali bendanga agütsüshia inyaksü ayongzüik. Senden nungsa DC-i, taruba Nagaland Olympic and Para Olympic games koba Dimapur aser Chumoukedima district nung February 13 nungi 17 tashi asayatsü lir iba indang metetdaksü. Asayamung kecha tetsükdaksü makai asayatetsü atema senzusenpong aser logistics asoshi senotsü teyari agütsütsü atema Nagaland Olympic Association (NOA)-i DPDB Dimapur dang mepeshiba dak sendakba nung Dimapur district nungi MLA asem aser sorkar department temi tenla agüja NOA nem teyari agütsütsü telemtetba agia

liasü. Kasa mapang nung Advisor Moatoshi-i, Dimapur nung iba amala sentong ayongzüika agiba mapang HOD tem khuret lir ta shia parnok dang teyari agütsütsü ajungshia liasü. Advisor Hekani-ia, 2024 küm ya Dimapur district atema tajangzük akaba küm ka asütsü temulung lema bilemba lemsatepa liasü. Senden nungsa, taoba DPDB senden minutes lepa reprangshi, lokti tentet balala züngoksemtsü atema sensak asem aser Sr. SDEOs, Directorate of school education DPDB senden nung dendaktsütsü atema sensaksema liasü. Iba senden ya mendenbubai tepela o jembir tembanga liasü.

Anogo pongu atema Film Appreciation Course tenzükogo

Dimapur, Aenjeti/January 29 (TYO): Department of Information and Public Relations aser Film and Television Institute of India (FTII) na longjemer anogo pongu atema Film Appreciation Course ka January 29 nü DIPR Conference hall, Kohima nung tenzükogo. Iba course lapokba sentong nung ojembiba mapang Joint Director IPR, Asangla Imsong-i ashiba agi, Azadika Amrit Mahotsav nung shilem ka ama training agiyonga aruba nung iba course ya tatembangbuba lir. Nagaland nung aliba scheduled tribe tem atema angati training agütsüba atema FTII dang kanga pelaba lai lemsatepa liasü. Film tem ya kanga dang tashi tait hadir ka aser iba ya ajak asoshi kasa dang lir aser course ya movie tem nem tenüngsang agütsütsüba atema dang masü

saka movie koma yanglur iba indang tali tajungba angatetdaksütsü asoshi ayongzüika agir, ta laisa shisem. Course Director ya Prof. Niyaz Mujawaris lir, shiba National Film Award- Winning Filmmaker ka aser FTII, Pune nungi graduate asüba nisung ka lir. Pa ya feature Film "Tajmal" indang director liasü aser iba fim yagi 67th National Film Award, Best Film on National Integration, 2019, aser Indic Film Festival 2021 Best Film award anguba nisung ka lir. Pai ashiba agi, movie ya sudok sünemtsü atema dang masü saka nüburtem nem tangazükba agütsütsü asoshia lir. Paisa, workshop mapang film tapu balala indang tangazükba agütsütsü ta ashi. Iba sentong ya Information Assistant Avika Awomi lenisüba nung agia liasü.

Tening nung Bedi Bachao Bedi Padhao marathon asemogo

Dimapur, Aenjeti/January 29 (TYO): Tening jila Administration-i Bedi Bachao Bedi Padhao sentong kübok "Run the Race.... Raise the Girl" omen nung ajemdaker tetsürtem atema marathon asemtepba ka ayongzüika katsüogo. Iba marathon ya January 27 nü asem, kong Tening temeket nung aliba tesemtem nungi tinlonglong aiür chanu arishi küm 11 nungi 18 tashi nung alirtemi shilem agia liasü. Sentong nung ADC Tening,

Lemlila Sangtam, aiür chanurtem dang taküm nung takokba tashi tajungtiba agütsütsü aser takok ngua aotsü ajungshi, kechiyong parok ya tarutsü nung lokti asoshi sentilongtem lir, ta ashi. Laisa, sentong nung shilem agirtem dang tamang kodanga mesamatsü aser nükjidong tajung yur takok angutsü atema takokba tashi meranga inyaksü ajungshia liasü. Iba sentong ya takokertem aser shilem agirtem nem kuli kakat aser sempet agütsüba sülen tembanga liasü.

Nagaland nung 4buba Asia Music Summit 2024 ayongzüika agitsü



Kohima, Aenjeti/January 29 (TYO): 4buba Asia Music Summit (AMS) 2024 February 1 nungi 3 tashi Kohima nung ayongzüika agitsü atema Nagaland renema lir. Iba ya Music Connect Asia indang sentong ka lir aser Task Force for Music & Arts (TaFMA) Government of Nagaland-i ayongzüika agitsü. "Sentong atema renemshi tenzükogo," ta TaFMA mendenbuba Theja Meru-i ashi. February 1 nü 6:00 ako nung Capital Cultural Hall, Kohima nung Nagaland's Chief Minister Neiphiu Rio-i iba sentong tenzüktsütsü. Summit lapokba sentong ya ajak atema angati asütsü ta shia Meru-i, Kohima nung alirtem aser Kohima district aser tanga districts nung aliba music school tem dang iba sentong nung shilem agitsü jaokogo.

Küm aika tsüngda iba ya state nung music dak sendakba sentong tulutiba lir, ta pai ashiba den taruba summit atema teyari agütsüba asoshi state sorkar dang kanga pelaba lemsatep. Meru-i ashiba agi, iba summit ya anogo asem atema shisatsü aika angazükba mapang ka asütsü, kong alima ajunga nungi festival director 10-12 kati parnok shisatsü aser tajangshiba tem lemsateptsü. Delegates tem tenüng züngoksemtsü atema February 1 nü Capital Cultural Hall Kohima nung 3:00 ako nungi mapang lapoktsütsü aser February 2 nüa 8:30 ako nungi maneni RCEMPA nung mapang lapoktsütsü. Nüburtem online ajanga tenüng mezüngoksemia liaka sentong agitsüba tesem nunga tenüng züngoksemtetsü, ta paisa metetdaksü. Summit nung delegate tem rongnung Jason Mayall (UK/

Japan), Director Fuji Rock Festival, Alejandro Orellana Quiroz (Santiago De Chile), Artistic Production Director of WOMAD Chile Festival, Alfredo Caxaj (Ontario, Canada), Executive & Co-Artistic Director of SUNFEST, Carlos Seixas (Portugal), Artistic & Production Director of FMM Sines Festival, Fabio Scopino (Italy), CEO, Co-Founder & Director of Italian World Beat/Musicconnect Italy, Lama Hazboun (Jordan), Founder Orange Red & Amman Jazz Festival, Poom Piyasu Komaradat (Thailand), Promoter Maho Rasop Music Festival & Pow Fest, Sungchun Lee (South Korea), Executive Director Seoul Music Week & Producer Sound Puzzle, Franki Raden (Indonesia), Founder Indonesia Music Expo & Toraja International Festival, Riju Tuladhar (Nepal), Musician, Co- Founder of

Echoes In the Valley Festival, Sonam Dorji (Bhutan), Director Hidden Kingdom World Music Festival, Mehreen Mahmud (Bangladesh), Singer, Composer & Music Event planner, Abu Metha (India), Advisor to Chief Minister of Nagaland and chairman IDAN, Moa Subong (India), Recipient of Padma Shri Award & Founder of Abiogenesis, Khyochano TCK (India), Founder of Brillante, the world's only multi-genre piano festival, Shyamkanu Mahanta (India), Entrepreneur, Writer, Founder & Chief Executive of North East Festival, Ujjwal Mukhia (India), Founder of 03 Group, Divya Bhatia (India), Director & Producer Jodhpur RIFF, Eddie Prithviraj (India), Producer Global Indie Festival, Mumbai & Matras Jazz Festival aser Rumpa Banerjee (India), Head- Corporate Communication & Member Relations at The Indian Performing Right Society Ltd. Maneni kenten sentong atema kentenba telok 21 shimogo, kong Ooberfuse, Nchanter, Rain in Sahara, Aloba Naga & The Band, Trance Effect, Abiogenesis, Version 2, Tetseo Sisters, Colored Keys, Coronation Choir, Atsa Lang Roths, Abdon Mech, The Glutbones, Cantamus Choir, African

Amakishiu and J M e, Benry Moses, Imna Yaden, Kekhrie Ringa, Jonathan Angami, Ruzazho Tati Folk Song Group aser Southern Angami Cultural Society densema lir. RCEMPA Jotsoma nung February 2 aser 3 nü music showcase, workshops, mentoring session, panel discussion, business, networking, one-to-one session amala sentongtem agitsü. Tang tashi nung iba summit nung linük 12 nungi shilem agitsü jangaago, kong Japan, Santiago De Chile, Ontario-Canada, Portugal, Italy, Jordan, Thailand, South Korea, Indonesia, Nepal, Bhutan, Bangladesh aser host India densema lir. Iba summit ya kentenba teloktem, Agents/Band Manager Musician tem, Music institute tekolaktem, Music tesayurtem, sempet aketba manager tem, event management company tem, Music producer, ken mejemertem, Music jangrarterem, Music labes aser Music festival director tem atema lir. Asia Music Summit ya 2020 küm tenzük aser Global Toronto den longjemer küm ana atonga agiogo. 2023 küm 3buba edition ya Ulsan, South Korea nung agia liasü. Asia Music Summit ya kümshia agiba sentong ka lir.



January 29, 2024 nü Kishanganj nung Congress lenir Rahul Gandhi-i 'Bharat Jodo Nyay Yatra' agidang tangokba noksa nung angur.

Hopta ka tsünga linük tesem ajaklen CAA benoktsü: Shantanu Thakur

Kolkata, Aenjeti/January 29 (Agencies): West Bengal kübok South 24 Parganas nung lokti senden ka nung jembidang BJP lenir aser Union Minister of State, Shantanu Thakur-i, taruba anogo tenet tsünga linük tesem ajaklen Citizenship (Amendment) Act (CAA) mapa küma benoktsü, ta metetdaksü.

Union Minister of State, Thakur-i, hopta ka tsünga India kübok state ajak nung Citizenship (Amendment) Act (CAA) mapa küma benoktsü, ta ashi.

Minister of State of Ports, Shipping & Waterways, Shantanu Thakur-i, Ayodhya nung Ram Mandir semzükogo aser taruba anogo tenet tsünga linük tesem ajaklen CAA benoktsü, ta ashi.

"2014 küm December 31 anogo tashi nung mesüra iba anogo matongdang Afghanistan, Bangladesh mesüra Pakistan nungi arur Hindu, Sikh,

Buddhist, Jain, Parsi mesüra Khristantem Central sorkari agizüksü (senso agütsütsü); clause (c) of sub-section (2) of section 3 of Passport (Entry into India) Act, 1920 mesüra Foreigners Act, 1946 mesüra iba sülen yangluba ozüngtem kübok parnokji ozüng alema arurtem ama mezüngshitsü," ta pai metetdaksü.

2019 küm December ita nung Parliament nung CAA agizükba sülen linük tesem aika nung iba ozüng anema longkak aita liasü.

Yaküm Union Home Minister, Amit Shah-ia, CAA ya shingai menokdangtetsü, kechiyong iba ya linük ozüng lir, ta metetdakja liasü.

CAA anema nokdakertem rongnung West Bengal chief minister aser Trinamool Congress (TMC) tongti, Mamata Banerjee densema lir.

2019 küm Lok Sabha election aser 2021 küm West

Bengal nung assembly election atema nüboyimba mapang nung BJP-i CAA mapa küma benoktsü nangzüka liasü.

2019 küm Parliament nung CAA agizükba sülen state pongu- West Bengal, Punjab, Kerala, Madhya Pradesh aser Chhattisgarh state tem nungi Chief Minister temibo, Citizenship (Amendment) Act, 2019 ya linük temzüng alema lir, anungji parnok state nungbo iba ozüng benoka meinyaktsü, ta sangdonga liasü.

Iba mapang nungji Home Ministry nungi tongti ketdangser kati, "Central ozüng ka benoka meinyaktsü atema item state tem dak tashi mali, kechiyong iba ozüng ya Union List nung densema lir," ta metetdakja liasü.

7th Schedule kübok Union List nung items 97 lir, aser item rongnung defence, external affairs, railways, citizenship aser naturalization densema lir.

Modi maneni PM kümra democracy jenjang majungtsü: Kharge

New Delhi, January 29 (Agencies): Hombarnü Odisha yimtiba, Bhubaneswar nung Congress party nung inyakertem den jembidang Congress Tir, Mallikarjun Kharge-i, Narendra Modi maneni Ato kilonser kümra linük nung democracy jenjang majungtsü, ta metetdaksü.

Mallikarjun Kharge-i, "Modi yimsüsüba kübok democracy malitsü, elections malitsü saka kijai tashi amshitsü," ta metetdaksü.

Paisa nüburtem dang iba ama tensaji metettsüla, pei vote temeden amshitsü atema taruba elections (Lok Sabha) ya tatembangbuba maongka asütsüa akok, ta ashi.

"Parnoki ajak nem (ED) notice agütsür. Parnoki nisungtem amokmerener. Tetsübu ajanga karibo medemer toktsür, kari party toktsür aser kari teloktep toktsür. Iba ya vote agütsütsü atema na asoshi tatembangbuba maongka asütsü. Iba sülenbo vote magütsütsü," ta pai ashi.

Kharge-i ruling Bharatiya Janata Party (BJP) aser Rashtriya Swyamsevak

Sangh (RSS) ya miim indang agents lir, aser ibaji ajanga India nung loktiliba miim kümdaktsür, ta ashi.

"Rahul Gandhi-i linük longjemdaktsüner, pai 'Mohabbat ki Dukaan' lapokogo ta pai ashir. Ajisiüka BJP aser RSS-ibo 'Nafrat ki Dukaan' lapok. Ibayongji na kümküma alitsü nungdak. BJP aser RSS ya miim lir aser parnoki asen temeden magütsür," ta Kharge-i ashi.

Paisa Ato kilonser Modi den loktepba regional lenirtem aitsü; talisa Odisha Chief Minister Navin Patnaik-i Ato kilonser den tesendaktep yangluba atema aitsü.

Tawa Bihar Chief Minister Nitish Kumar-i opposition INDIA teloktep toktsür BJP-i aniba NDA den longjemba dak sendakba nung Kharge-i, kari opposition teloktep toktsüba ajanga kecha balaka masütsü, opposition longjemba tashi ajanga BJP anema tokteptsü, ta ashi.

Mallikarjun Kharge-isa, Nitish Kumar-i Opposition teloktep INDIA toktsüyonga Congress-i aniba teloktepi takok angutsü, ta metetdaksü.



January 29, 2024 nü Patba nung RJD tongti lenir, Lalu Prasad Yadav Enforcement Directorate (ED) office-i aodang tangokba noksa nung angur. Mapa atema ali agiba ochimashi ken o dak sendakba nung asüngdangyatsü atema ED-i pa jaok.

AAP-i Haryana assembly election nung tangar den meloktepi tokteptsü

New Delhi, Aenjeti/January 29 (Agencies): Hombarnü AAP tongti lenir aser Delhi Chief Minister, Arvind Kejriwal-i, AAP-i taruba Haryana assembly elections nung menden ajak (90) nungi tokteptsü, ta metetdaksü.

Aam Aadmi Party (AAP) tongti, Kejriwal-isa, taküm Haryana Assembly elections nung AAP-i party shinga den-a meloktepi tokteptsü, ta ashi.

Tang Punjab aser Delhi na nung AAP sorkar lir.

Haryana nung lokti senden ka nung jembidang Kejriwal-i, taruba Lok Sabha elections nung AAP-i opposition INDIA nung aliba party tem den longjemer tokteptsü, ta metetdaksü.

"[Haryana] Tip anatsülen (Delhi aser Punjab nung) AAP sorkar lir, anungji kechiba tiyongtsü (Haryana) nungjia kasa sorkar malitsü?" ta pai

asüngdang.

"Election ji October nung agitsü aser ibaji nenok ket nung lir. Haryana nunga AAP shimang. Yangi onoki sorkar akümtsü ta ni amanger," ta paisa metetdaksü.

2019 küm Haryana assembly elections nung BJP-i takok ngua liasü. Assembly menden 90 aliba Haryana state nung BJP-i menden 40 aser Congress-i menden 31 ngua liasü.



January 29, 2024 nü West Bengal Chief Minister, Mamata Banerjee-i Cooch Behar district semdangba mapang telok ka den tsüngsangdang tangokba noksa nung angur.

Feb 27 nü state 15 nung RS menden 56 atema election agitsü

New Delhi, Aenjeti/January 29 (Agencies): Hombarnü Election Commission of India (ECI-i, February 27 nü state 15 nung Rajya Sabha menden 56 atema election agitsü, ta metetdaksü.

State 15 nung Rajya Sabha züngsem 56 indang kümsük taküm April ita nung tembangtsü, ta Election Commission-isa metetdaksü.

Rajya Sabha election agitsü aliba state temji- Uttar Pradesh (nung menden 10), Maharashtra (menden 6), Bihar (6), West Bengal (5), Madhya Pradesh (5), Gujarat (4), Karnataka (4), Andhra Pradesh (3), Telangana (3), Rajasthan (3), Odisha (3), Uttarakhand (1), Chhattisgarh (1), Haryana (1) aser Himachal Pradesh (1) state tem lir.

Kobi melii Rajya Sabha nung kümsük abensatsüpurtem rongnung taoba mapang Ato kilonser Dr. Manmohan Singh aser BJP National Tir, JPNadda na densema lir.

Uttar Pradesh nungi Rajya Sabha MP 10 kümsük April 2,

2024 nü tembangtsü, Maharashtra aser Bihar na nung MP trokrok (6) kümsük April 2, 2024 nü tembangtsü aser West Bengal o Madhya Pradesh na nunga MP pongungu kümsük kasa anogo nung tembangtsü.

Karnataka aser Gujarat na nung MP pezüzü, Andhra Pradesh, Telangana, Odisha aser Rajasthan state shia nung MP asemsem April 2, 2024 nü tembangtsü.

Chhattisgarh, Haryana, Himachal Pradesh aser Uttarakhand state shia nungi MP kaka kümsük ill April 2, 2024 nü tembangtsü.

Election atema February 8 nü sangdong agütsütsü, February 15, 2024 tashi nung nominations agütsütsü, nomination agientsü atema tatembangbuba anogoji February 20 asütsü, February 27 nü election agitsü aser kasa anogo nung nikongdang 05:00 ako nungi vote azüngtsü aser February 29 tashi nung election dak sendakba maparen ajak tembangtsü.



TIR YIMYIM YIMOBILEM (EDITORIAL)

DIMAPUR SANGTENNÜ, JANUARY (AENJETI) 30, 2024

Opposition INDIA Telaor Asü?

- Tangsen Lemtur

Taruba Lok Sabha election nung BJP-i aniba NDA anema tokteptsü atema ita tenet tejaklen opposition party temi INDIA teloktep tenteta lir, ajisüaka iba teloktep tentettsü atema mezüng ayongmesosang- Bihar Chief Minister, Nitish Kumar-i iba teloktep toktsür BJP den züklokba ajanga INDIA teloktep jenjang majungtsüsa tensa ka ajangshiogo. Opposition longjemtsü atema mezüng Bihar yimtiba, Patna nung senden ayongzüka amen, saka iba state nung tongti leniri tama opposition teloktep toktsüogo. Aikati iba ya INDIA teloktep laotsü temaitsü ka lir ta bilemer. INDIA teloktep 2020 küm Bihar state assembly elections nung Nitish Kumar-i aniba JD(U)-i BJP den lokteper toktepa takok angu, ajisüaka 2022 küm pai BJP den teloktep raksaa liasü, aser tang ano pai BJP dangisa meyiper. Bihar nung Kumar-i aniba JD(U)-i Congress aser Rashtriya Janata Dal den lokteper akümba sorkar anenba sülen pai BJP den longjemer sorkar tasen kümogo. Ano külen INDIA teloktep nung aliba Trinamool Congress tongti lenir/ West Bengal Chief Minister Mamata Banerjee aser Aam Aadmi Party lenir/Punjab Chief Minister Bhagwant Mann natia taruba election nung peipei state nung Congress den menden melemsai tokteptsü, ta sangdongogo. Tang tashi nungbo INDIA teloktep senden amenba sülen parnoki osangbenertem senden ayongzüka jembiba dak alaka lokti senden tulu ka danga ayongzüka magi. Lok Sabha election agitsü atema joko ita asem shi dang lir, ajisüaka INDIA teloktep nung party tem tsüngda menden melemsatepteti arudang INDIA teloktep nung tongtibang lenir katibo iba teloktep toktsüogo. Joko atapisüa alitsü mapang ka masü sür nung opposition teloktepi longjemer lokti senden-a ayongzüka magiteter aser election atema asalentong meyangluteter. Joko opposition teloktep nung aliba regional lenirtem melungjang nung tarendakba aruogo. January 13 nü ayongzükba INDIA teloktep senden nung Mamata Banerjee, Shiv Sena tongti lenir Uddhav Thackeray aser Samajwadi Party tongti lenir, Akhilesh Yadav nungeri maden. Kuli balala ajanga opposition teloktep jenjang majungtsü sayur. Iba ama mapang ka nung BJP bo election atema nüboyim tenzükogo; parnoki election nung takok angutsü nükjidong nung dang masü saka opposition jenjang-a mejungi raksatsütsü nükjidong nung inyaktsü. 2024 küm Lok Sabha election nung BJP anema tokteptsü atema 2021 küm January ita nunga Mamata Banerjee-i party balala nungi lenirtem kibok nung ajurua jembishinü tenzuka liasü saka lai iba teloktep nungji Congress bo medendaktsünüi liasü. 2019 küm Lok Sabha election atema Mamata-i Kolkata nung opposition party 23 nungi lenirtem senden ka ayongzüka agi aser parnoki BJP tamakok ngudaktsütsü atema tenangzükba agia liasü saka opposition melongjemteteti BJP-isa takok ngua liasü. 2019 küm General election nunga BJP anema opposition party tem melongjemtet aser 2024 küm election atema-a opposition party temi INDIA teloktep tenteta lir, ajisüaka opposition nung tongti party- Congress tashi maitba den külemi state balala nung party tem tsüngda menden lemsatsü aikati memelunger, anungji taruba election nunga opposition party temi kecha mesütettsü südi ta bilemer. Taruba election nunga BJP-i menden peria ngua sorkar akümtsüa akok, saka parnoki menden peria mengutetra iba ama tensa kaji ajanga dang opposition longjemtsüa akok; ajakji mapangi dang ashitsü.

OLEMSABANG

Sen aser rongsen kisung agi nisung taküm malir

~ L. Kika Pongener.

(Yashi adok nungi...)

Tanü putu nung sen dang lirbo aseni kechi aginur ajak angur, aser kechi inyaknur ajak inyakteter, oda nisung taküm tepsettsü tashia akoktsü, aser alima rangben ya-a alizükttettsü. Atangji, sen dang lirbo kechi inyaknur ajak inyaktettsü, sen dang agutsürbo nubur ajak aseni tenya-ashi angar akümtsü, lanur nubujong, mesura samaro nisung tamajung ajungaji aseni sen agi alizüker, aseni kong koda anishinur yamaji anishitsü akoktsü. Kechiyong sen aser supokrem agi nisung tenuk pokdaktsür aser nisung dang meimtsü aser aochia bilemba shisatsü samadaktsür. Nisung aikati sen dang ngurbo meinyaktsüyim mapa ajak inyaktsü temulung ulua akümer aser nisung dang aaktsüba shisatsü meli-i akümer. Anungji shirnok nem Tsüngremi rongsen moatsü, parnok ajaki Tsüngremi ne nem moatsüba rongsen jagi alima nubur asoshi terenlok, mapa tajung inyaktsüba lenmang nung amshir asü (?) Mesura alima raksatsü, yimden, arogo aser lokti nung mepetmesu aser telemsa adokdaktsütsüba lenmang nung amshir...??? Ibaji asenok ajaki khen arokaroka shisadangdi. Tsüngrem oi ashir... "Kechiaser nisungi alima ajak ajangzüker pei taküm samara, pai kechi ajangzüktsü, mesura nisungi pei taküm melen kechi agutsütsü" (Mathi-16:26). Pei taküm arishi lepdokra kanga tesasatsüka asütsü.

Asenok alima nung arishi talangka aliyongjia tenem ser metsü, mesura lir ana-su dang alitsü. Anungji iba arishi anogo tatsüka alidangji, mapang tajung alangzüka mapa tajung inyaktsüla. Asenoki Bank aika nung sen aika rizünga yur, ki tulu aika atongtepa yanglua yur, kimonglumong aika alidena yur, chiyungtsü chir mechima nangdaka yur jangradema kecha teblemetsü mekai liaka, saka item rongsenji magitettsüsa, chiyungtsüji mechitettsüsa, aser anu kodang adoker kodang ayir memeteti, yipden nungi mesakteti, asen sasa asen temang memeyipteti, ayako dena alitsüsa tashitak tamajung kar agi menepra...!!! Iba ama aliba takümji alima nung tali meshizük asütsü. Aser ano tia makar karbo anjung tenari dang anu ayiba ama, anojungi arishi leptokra koda tesasatsüka asütsü...!!! Yisu-i o entepba ka ashiba...Takar nisung kati alu nung tsük jenti aro, aser pai pei temulung nung ashi, Ni kechi inyaktsü (?) Kechiaser ni kü tsük kongga tayudak maka. Ni kü Jentem benzüker tuluba yangludi aser idakji ni kü tsük ajak rizüngtsü. Aser ni kü Tanela dang ashitsü, "Tanela küm aika asoshi rongsen aika rizünga lir, kazüa liang, chiang, jemang aser pela-a liang". Saka Tsüngremi pa dang ashi, Na tamashisang !!! Taonungsa ne taküm ne dak nungi akangtsü, aser kechi rongsen nai rizüng aji shir meyong asütsü...??? (Luke-12:16-20) nung iba otsü angutsü. Aji oda, iba takarsang tsük paikaji bendena liaka Tsüngremi "Taonungsa ne taküm ne dak nungi akangtsü" ta...'O' ka dang ashi nung aji tatempang liasü. Asenoki asen rongsen dak temulong lemer Tsüngrem memeteti taküm lira, asenok daka kechi ataloktsü aseni meteta maka...Arung asenoki tamasa Tsüngrem bushidi.

Atangji, nisung ya sen aser rongsen kisung agi taküm ya alir masü, saka Tsüngrem taochi aser Pa o agi taküm alir. Küm ishika sua ogo, alima nung takartisang Bill Gates sen Billion aika bendena akayongjia, iba sen jagi pa arishi malizükttet aser pa taküm mekümzüktteti taküm arishi tembangba asenoki meteta lir. Asenok mimchir-i sen aser rongsen bushidang, Tsüngrema ama-adoker, nisung taküma mapayur, taaktsüba shisatsü meli-i akümer. Ajisuaka, aseni bendenba rongsen jagi asen taküm mekümzükttettsüsa tensa mapang kati meneptsü. Kenu anogo aseni bendenba rongsen ajak toktsür teka tazüng leperi aotsü. Atangji, asen mimchir ya sen aser rongsen kisung agi dangpo taküm ya malir.

NAGA NUNGER NÜCHISO BUSHIBA NUNG KIBONG AJUNGAI BENDANGA AGÜTSÜBA

~Temsuramok Jamir, Longmisa, Salangtem Ward Mokokchung

Late. Takatemsü Longkumer Longkhum Village, NNC Youth General Secretary Nagaland, tebu Imlimeren asen Ao lima lanur wara nungi kümzüktsü atema Teptsü (ayak) ateper liasü. Chirnurtemi Indian Army yimaker den raratsü atema Federal Army nung adenba atema tebu Imlimeren jail-i (padaki) 24 ben oa liasü. Par jala Tiajungla NNC Women Society President Nagaland, Teka Soya Federal Army Colonel, Alemtemjen 19th Battalion Captain, Imsütoshi Captain Federal Army Eastern Nagaland Myanmar.

Asen nüburttem tsürabur koba ochi tongpang rara taküm agütsü, ibai ngua linük yoka achir ka masü saka asen lima kümzükdi ta ayongzüker.



TAKATEMSÜ: 1933-1954

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Nepal nung pastor Keshab Raj kum ka tepuokdak ayutsü



Pastor, Keshab Raj Acharya'er kibong noksa

January 29, 2024: Nepal nung Pastor, Keshab Raj Acharya-i sarasademba aser yimsü dak sendakba maparen balala inyakba atema pa kum ka tepuokdak ayutsü.

Pastor Keshab-i Supreme Court dang bail nung chioxtsü mepishi saka magizük.

Pastor-isa court dang tepuokdak ayutsü obendang melen senchi ang agitsü mepishia lir, ajisüaka tang tashi telangzüba mangu.

Khristan melungtet telok ADF International-i, "Pastor Keshab-i mepishiba ama tepuokdak ayutsü melen senchi magira pa tepuokdak ayutsü," ta metetdaksü.

"Pastor Keshab-i mepelaba lemsatepogo saka teimla mesamar. Nepal nung yimsü temeden kumzüka ayutsü atema alima linüktem ayongzüker," ta kasa sangdong nung shia lir.

Pastor Keshab-i, "Tepuokdak maneni alitsü ya tejashitsüka lir, ajisüaka ni Tsüngrem dak anisüngzüker aser Pa ajanga ajak takoktsü ta amanger," ta metetdaksü.

Arrshi kum 35, Keshab Raj ya Nepal kübok Pokhara nung aliba Abundant Harvest Church nung pastor inyaker. Pa aser par kibong lenmang balala ajanga nungita yarirtem aser sarasademtsür ajak dang pai pelaba lemsatepogo.

2020 kum March ita nung Pastor Keshab-i sarasademtsü atema pai par kidangi nisung ka jaokba sülen pa anema ken o benoka liasü. Pai tanga yimsü amangertem melung yirutsüogo aser tangartem Khristan yimsü dangi meyipdaksür, ta tai tonglokja apu.

Dolpa District Attorney office-i Nepal criminal code kübok pastor anema ken o benoka liasü.

2021 kum November ita

nung Pastor Keshab kum ana tepuokdak ayutsü obendang agütsü aser senchi 20,000 chia liasü. Tesülen Jumla High Court-i tepuokdak kum ana ayutsü obendangi kum ka ajema kümdaksü.

Pai Supreme Court nem temepishiba ken o agütsü saka Supreme Court-ia kasa obendang agütsüba ajanga pa kum ka piyong tepuokdak ayutsü.

ADF International nung Asia atema Advocacy Director, Tehmina Arora-i Supreme Court obendang aitsüba den külemi Nepal nung meimchir temeden balala anema inyakba aser yimsü temeden magütsüba atema Nepal aitsü.

Pastor Keshab-i tangar kar Khristan yimsü dangi meyipdaksü, ta kulisür shinga maliasü, ajisüaka

Supreme Court-i pastor anema obendang aütsüba ajanga aika süngmanger.

Pastor Keshab kinungtsü, Junu Acharya-ia la kinüngbui aibelena mali saka court-i pa anema obendang agütsü, ta ashi.

Laisa, Nepal sorkari linük nung Khristan yimsü prokba anema inyaker südi, ta ashi.

2020 kum Coronavirus wara mapang nung Pastor Keshab-i tanela tsütsülen nungi tetuyuba kar agütsüba video ka YouTube nung prokshiba sülen pa aiben puogo.

Pa anema kuli tejangja mali aser court nunga pa anema kuli agütsür mali, ajisüaka court-i pa aitsüogo, ta ADF-i metetdaksü.

International Religious Freedom Roundtable aser U.S. Department of State indang International Religious Freedom report 2020 ajanga-a tim masüba nung Pastor Keshab puogo, ta shia liasü.

Voice for Justice nung

chairman, Joseph Jansen-i Nepal nung anti-conversion ozüngtem tim mesüi amshiba atema Nepal aitsüogo.

Paisa, Pastor Keshab-i pa indang yimsü temeden amshi, ajisüaka court-i pa temeden anema inyakogo, ta metetdaksü.

2018 kum nungi tenzüka Nepal nung Khristantem anema inyakba kanga bulua kumogo. Joko Nepal nung tamangba yimsü meyipdaksüba ya ozüng alema inyakba ama züngshir.

January 30 nungi International Religious Freedom summit tenzüksü

Washington, January 29 (Agencies): Alima tesem balala nung tamangba yimsü temeden atema inyaker lenirtem aika Washington D.C nung adenshitsü aser 4buba International Religious Freedom (IRF) Summit nung adentsü, ta International Christian Concern (ICC)-i metetdaksü.

Kum shia ayongzüka agiba IRF Summit ya January 30-31 anogotem nung Washington Hilton nung ayongzüka agitsü. Iba sentong ya ICC densema yimsü dak sendakba organization 70 dak temai nungita pusemer.

IRF Summit ayongzükerter aser taoba mapang IRF atema U.S. Ambassador, Sam Brownback aser Lantos Foundation for Human Rights Tir, Katrina Lantos Swett nati iba summit nung o jembitsüpurtem aika jaokogo; iba summit nung o jembirtem rongnung Congress nungi züngsemtem aser reshikangshi ajangshirtem densema lir.

Iba summit nung o jembitsüpurtem rongnung taoba mapang US tatong Tir, Mike Pence, IRF U.S. Ambassador Rashad Hussain, aser U.S. Commission on International Religious Freedom nung vice

ANOGO ABEN TSÜNGREM DEN

Asenok temeimi rongmesoba

O temeshi Oba, alimai na memetet, saka ni na metet; aser Nai ni yok ta item yagi metet: aser ni parnok nem Ne nung metetdaksü, aser ano metetdaksütsü, anungji kechi temeim agi Nai meim aji parnok dak alitsü, aser ni parnok dak alitsü.

- Yohan 17:25-26.

Nai Tsüngrem yimlijji metetet; nai Tsüngrem yimlijji noktanger. Pa temeimi ne dak mekongshi tashi na Tsüngrem anasa alitsü makok. Kotaker Tebui Techir dang tatem maka temeimi meim. Tebui temenen lima temulung raksaa meimba Pa jabasoi Pa taküm ajanga jungkai adoktsü. Tebui meimchir kumzüksü sentong atong aser Techiri mapaji agizük. Iba jagi Pa kangki dongi ani.

Yisu meimchir rongnung jajadang, Tebu temeimi par chir süngdaksü. Mashi temeim agi Pa kangki atutsüsa majungshitsü ta Yisui metetta liasü. Meimchir temeimi Pa taküm ajanga agi Tebui ashiba abensaa tashi angatsü makok ta Yisui angatetta liasü. Tebu tekümtet mapa sentong nung Pa taküm bendanga agütsütsüsa Tebu temeimji dang tashi tait liasü.

Kasa temeimji nütsüngtem nema agütsütsü Yisui sarasadem. Tebui parnok nem agütsütsü aliba mapa atemaji tanga tajung shibaji teperi masü ta Yisui metetta liasü. Tsüngremer telangzübaji Par chir parnok dak lidaktsütsüba liasü. Khristan ka asoshi pa temeimer agi sünger Tsüngrem den Pa mission nung malitsüba tamakoktsü.

Pa temeimi sünga melira nai shinga dang Tsüngremi na yok ta kuli mesütettsü. Nai tangar dang tai metoktetsü aser talila mile moutettsü mesüra tangar asoshi tenla magütsütsü. Item ajak inyaktettsü asoshi na mezüngbuba Tsüngrem temeim agi sünga alitsüla. Tebu aser Pa masadangtetba temeim bushiang; aji sür na ajanga tangar dang meimtsü Techir dang melaang.

chairman, Frederick Davie nung densema lir.

IRF Summit nungji alima tesem balala nung tamangba yimsü temeden jenjang tamajungba akumba tebilemtsü bentettsü atema jembitsü.

China, Iran aser India ama linüktem nung Khristan yimsü prokba nokdangogo aser Russia aser Azerbaijan ama linüktem nung rara nung ajemdaker yimsü temeden anema inyaker.

Ambassador, Sam Brownback aser Katrina Lantos Swett nati sangdong ka ajanga, "Tang alima nung yimsü temeden jenjang mejungi lir. Alima nung nütsüng shilem 80 dak temabo yimsü temeden maliba linüktem nung alir. Item ama linüktem rongnung China, Russia, Iran, North Korea, Afghanistan aser Myanmar densema lir. Ajisüaka Japan aser Finland ama democracy linüktem nunga yimsü temeden mali. Iba dak alia India, Nigeria aser Pakistan ama democracy linüktem nunga yimsü nung ajemdaker ozüng alema inyakba tatalokbatem kanga bulua akümer," ta metetdaksü.

IRF Summit ya Khristantem densema yimsü nung ajemdaker reshikangshi ajangshirtem tebilemtsü onüktem benoka

jembitsü aser alima nung yimsü temeden jenjang ajungkettsütsü atema jembitsü asoshi sabang ka lir.

Brownback aser Swett natisa, "IRF indang summits ajanga ajungkettsüba kaji- telok kati telok ka atema jembitsüba lir; Yihuda nung sempaba anema Muslim nungertem ola adokba, Muslim nungertem atema Khristantemi pusema jembiba, Secular Humanists-i medemer aser kiyonger temeden atema nokdakba densema lir," ta metetdaksü.

Bodhbar nikongdang ICC-i Family Research Council on religious freedom violations in Western Democracies den sentong ka agitsü, aser iba sentong nung o jembitsüpurtem rongnung Arielle Del Turco (Director for the Center for Religious Liberty, Family Research Council), Andrew P.W. Bennett (International Religious Freedom Ambassador, Cardus), Dr. Aaron Edwards (Author & Theologian), Dr. Paul Teller (Executive Director, Advancing American Freedom) aser Elizabeth Francis (Legal Counsel, Global Religious Freedom, ADF International) nung densema lir.

AO OSHI ANGAZÜKDAK:
TANÜ ANGAZÜKTSÜBA OJANG



Shisanü

(n) shisatsü talubosa angudak (fount of knowledge)

* Ajak atema Laishiba ya shisanü lir.

Shisarajem

(n) temulung aser tokolok nung bilema asadangba (Philosophy)

* Kaketshir atema shisarajem mapa ya tongtibang lir.

OLONG PAITEP # 6682

1		2		3		4		5
			6		7			
8								
					9			
		10						
11								12
				13		14		
15								
16						17		

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Ameña - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6681 TELANGZÜBA

TIPLÉN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Moët Hennessy Louis Vuitton (LVMH) nung Chairman & CEO Bernard Arnault-i Elon Musk ajateter alima nung takartisang kümogo. French billionaire Arnault aser par kibong \$23.6 billion teimba aazüka \$207.6 billion tongogo ta Forbes ajanga ashir.

Hokolbarnü Arnault indang net worth ajanga Tesla CEO Musk indang \$204.7 billion net worth ajatet.

FORBES REAL-TIME BILLIONAIRES LIST: TOP 10 RICHEST PEOPLE

- 1. Bernard Arnault & Family (\$207.6 billion)
- 2. Elon Musk (\$204.7 billion)
- 3. Jeff Bezos (\$181.3 billion)
- 4. Larry Ellison (\$142.2 billion)
- 5. Mark Zuckerberg (139.1 billion)
- 6. Warren Buffett (\$127.2 billion)
- 7. Larry Page (\$127.1 billion)
- 8. Bill Gates (\$122.9 billion)
- 9. Sergey Brin (\$121.7 billion)
- 10. Steve Ballmer (118.8 billion).

Rs 1766 crore endoka Imphal Ring Road Project yanglutsü



Imphal, January 29, 2024

(Agencies): January 29 nü Manipur Chief Minister NBiren Singh-i Imphal Ring Road Project atema lung azüngtsüogo.

Iba lenmang ya Patsoi constituency kübok Takyel Khongbal Maning Leikai nung Rs 1766 crore endoka yanglutsü.

State sorkari Imphal nung traffic khuret ajema kümdaktsütsü atema Asian Development Bank (ADB) nungi senotsü teyari agia iba lenmang yanglutsü.

"Nütsüng yongsük teimba akümba ajanga traffic timtem tuluba akümer. Iba khuret ajemtsü atema state sorkari Imphal Ring Road Project nung temulung agütsür. Iba mapatong ya 2026 tashi nung renemtsü" ta CM Biren Singh-i ashi.

ADB-i iba ama mapatong tulu atema teyari agütsüba asoshi pelar aser iba ajanga nübertem aisü nung ajangzüktsü, ta paisa ashi.

"State sorkarisa Lamphelpat Water Body Rejuvenation Project tenzükogo aser iba nung Rs. 650 crores shi endoktsü. Maneni sorkarisa cable car ajanga recreation centre aser Imphal View Tower sendakteptsü" ta Biren-isa shisem.

CM Biren Singh-isa Takyel Khongbal Maning Leikai nung ground ka yanglutsü, Rs. 6.40 crores endoka Oriental College renloktsü aser College Fagathansi Mission kübok iba college nung Rs. 2.5 crore endoka infrastructure tajungba akümtsü osang metetdakttsü. Manipur state loksaa

odaktsütsü merangertem anema sorkari state kümzüka ayutsü anungji state nung alirtem longjemtsü ayongzükter, ta paisa ashi.

Imphal Ring Road Project ya 2015-16 nung tenzük saka 2020 nung ang iba mapatong agizük. Iba lenmang ya 51.23 km lir, ta Works Minister Govindas Konthoujam-i ashi.

Iba mapatong nung noise pollution control mechanism dena lir aser iba ya India nung mezüngbuba asütsü, ta Govindas-isa ashi.

"Rs. 1766 crore nungi ADB-i Rs. 1374.75 crores agütsütsü aser tanüngba senji state o centre sorkartemi agütsütsü. ADB-i agütsüba sen jagi road & bridges aser tanüngba senji land acquisition & others atema lir" ta Minister-isa metetdakttsü.

CM Khandu-i ropeways yanglutsü aser school yanglutsü metetdakttsü

Itanagar, January 29, 2024

(Agencies): Pradesh Chief Minister Pema Khandu-i ropeways tasen pezü yanglutsü osang metetdakttsüba den school reforms atema Rs. 300 crore endoktsü shiogo.

Iba mapa ana ajanga alinük tsütsü timtemtem ajemtsü aser Arunachal nung tanurtemi quality education angutsü.

Ropeway projects 4 ya

Ministry of Road Transport kübok detailed project report (DPR) nung lir. Iba ya ka Itanagar nung yanglutsü aser iba ajanga tourism o socio-economic development nung teyari angutsü.

CM Khandu'er mangdang nung education reform ya kanga tongtipang lir aser iba ajanga state nung aliba school tem tajungba akümtsü asoshi Rs. 300 crore lezmüktsür.

"Asen kaketshirtem, asen tanurtem ya asen tarutsü lir. Iba atema sorkari infrastructure tajungba akümer aser school tem yanglur" ta Khandu-i ashi.

2030 tashi nung National Education Policy 2020 tenzüktsüba ya tongtipang nükkjiong ka lir aser iba mission atema Expanded Core Curriculum (ECC) tamendakdak lir, ta paisa ashi.

Meghalaya BJP lennir Hek nem Dadasaheb Phalke Award agütsü



Shillong, January 29, 2024

(TYO): Meghalaya nung BJP lennir tejen aser Animal Husbandry and Veterinary Department minister Alexander Laloo Hek nem Dadasaheb Phalke Award agütsüogo.

Meghalaya aser linük tenzükba wadang nung pai bendanga agüja inyakba atema

best minister aser social worker ama pa nem iba sempet agütsü.

Jantar Mantar, New Delhi nung aliba NDMC Auditorium nung Union Minister of State for Social Justice, Ramdas Athawale-i Laloo Hek nem iba sempet agütsü.

"Film industry nung alirtem

agütsüba sempet MPs o MLAs nem agütsüdag kü nem Dadasaheb Phalke Award agütsüba ya tetushi ulura lir" ta Hek-i ashi.

AL Hek-i kümsük trokbuba atema MLA inyaker aser pai küm 25 tashi Pynthorumkrah constituency nungi MLA ka ama inyaka arur.

Myanmar: ASEAN senden nung adentsü atema bureaucrat ka yok



Association of Southeast Asian Nations (ASEAN) Foreign Ministers tem Luang Prabang, Laos nung senden amenba mapang tangokba noksa nung angur. Tabellen nungi Myanmar ASEAN Permanent Secretary Marlar Than Htike, Philippine Foreign Undersecretary Theresa Lazaro, Singapore Foreign Minister Vivian Balakrishnan, Thai Foreign Minister Parnpree Bahiddha-Nukara, Vietnam Foreign Minister Bui Thanh Son, Laos' Foreign Minister Saleumxay Kommasith, Malaysian Foreign Minister Mohamad Hasan, Brunei Second Foreign Minister Erywan Yusof, Cambodia Foreign Minister Sok Chenda Sophea, Indonesian Foreign Minister Retno Marsudi, East Timor Foreign Minister Bendito dos Santos Freitas aser ASEAN Secretary-General Kao Kim Hourn.

Yangon, Aenjeti/January 29 (Agencies): Military-i yimsü súa aliba Myanmar-i, Laos nung Hombarnü Southeast Asian foreign ministers tem senden nung adentsü atema bureaucrat ka yokogo, ta Indonesia nung ketdangsür kati ashiba den ASEAN indang policy dak ajemdaker iba jenjang ya agiogo.

Myanmar general tem Association of Southeast Asian Nations (ASEAN) senden tongtibangtem nung adentsü atema tenokdangba maneni agütsür lir, kechiyong parnok 2021 küm sorkar atsüంగా sülen ita ana lir yimjung asoshi iba lokti tentet den tenangzüktepbä yangluba benoka inyaksangshia mesüi arudar aser linük mepetmesü tului idaktsüogo.

Senden balala atema

Myanmar jaokba dak sendakba nung ASEAN inyakyim ka lir a ser "non-political" representative ang senden balalai jaoker, ajisüaka taoba küm ana tsüంగా junta-i iba inyakyim ya magizük aser linük telung ken o nung ASEAN-i jushiba atema aitsüogo.

Indonesia Foreign Minister Retno Marsudi-i Reuters dang text message ka ajanga ashiba agi, Myanmar foreign ministry indang acting permanent secretary Malar Than Htike Hombarnü senden nung shilem agitsü atema Laos tongogo.

Iba osang ya ano tanga diplomatic sources anatia jangjashitsüogo.

"ASEAN inyakyim nung kecha temelenshi mali," ta Retno-i ashi. "ASEAN-i telemtetba agiba nung Myanmar-i mekongshitsü.

Retno-i taoba küm Myanmar nung teloktem tsüంగా sensaksemtsü tenzükda ktsütsü asoshi merangdanga liasü, kong shadow government aser kin balala telungpurtem den longjemer pro-democracy militias-i junta anema rara tenzüka liasü.

Military sorkari item teloktem den sensaksemtsü memulunger aser ashiba agi, item kiralongrartem teloktem den parnok sensak masemtsü.

2021 küm military-i sorkar atsüంగా sülen Myanmar nung mepetmesü tulu adoker lir, kong telok balala tsüంగా raratepbä ajanga nisung million ana shi pei talidak toktsü jenshiaogo aser human rights teloktemi, civilian tem dak tashiyim benshiba atema junta aitsüogo, koba parnok magizüki arudar.

Niger, Mali, Burkina Faso nung ECOWAS nungi atsüంగా nungo

Niamey, Aenjeti/January 29 (Agencies): Africa anüolen military-i yimsü asüba linük aseml regional bloc ECOWAS nungi atsüంగా nungo aser ashiba agi, iba lokti tentet ya züంగాsemtem atema amokmeren ka kümogo.

Niger, Mali aser Burkina Faso nungeri Economic Community of West African States (ECOWAS) nungi tangsa tang atsüంగా nungo atema telemtetba agiogo, ta linük asem külem sangdong ka ajanga Deobarnü metetdaksü.

Bendanger tashitemi amokbanga ECOWAS-i iba lokti tentet tamendakdak ashioktsüogo aser züంగాsem linüktem aser nütsüంగాyongsük asoshi amokmeren ka kümogo, ta kasa sangdong ajanga metetdaksü.

Linük asem yagi kiralongrar aser insecurity anema raraba mapang iba lokti tentet yagi parnok pu masemba atema aitsüogo aser kasa mapang nung ozüంగా alema aser meimchir dak mebenshitsuiba yimya benshia tenokdangba tesashi agütsüogo, ta ashi.

Kasa mapang nung ECOWAS-i sangdong ka ajanga ashiba agi, linük asem yagi iba bloc toktsütsü atema telemtetba agiba parnok nem memetetdaksü. Inyakyim nung yimya agi iba lokti tentet nungi atsüంగా nungo atema küm ka shi agir.

"Burkina Faso, Niger aser Mali nungeri ya lokti nung tongtibang züంగాsemtem lir aser tang yimden yimsüsüba tsütsü mangatettep adoker aliba sensaksema bentettsü asoshi

ketdangsürtem maneni bendanga agütsür lir," ta ECOWAS-isa shisem.

ECOWAS ya Africa anüolen political aser regional authority temaba ta züంగాshir, kong züంగాsem 15 densema lir. ECOWAS ya züంగాsem tem rongsenketzüంగా jenjang ajungkettsü nükjidong nung 1975 küm tentet.

Ajisüaka küm ishika tsüంగాda iba tesem nung military-i sorkar atsüంగా ajanga timtema arudar, kong lisopurtemi alirongsen ajanga parnok majangzükba indang ashishia arudar.

Mali nung 2020 aser 2021 küm military-i sorkar atsüంగా, Burkina Faso nung 2022 küm aser Niger nung 2023 küm military-i sorkar atsüంగా liasü.

Iba dak sendakba nung ECOWAS-i linük asemprongla suspend sütsü aser Niger aser Mali na nem tenokdangba tesashi agüja liasü.

Hokolbarnü Niger-i ECOWAS den tesendaktep yanglushitsü meranga ECOWAS züంగాsemtem linük yimtiba Niamey-i jaoka liasü, ajisüaka Togo nungi dang lenirtem arua liasü.

"Lokti tentet yongtsü nung tamang makatepi kümogo," ta Niger indang army-i shimba Ato Kilonser Ali Mahaman Lamine Zeine-i ashi.

Linük asem nung military lenirtemi parnok linük nung telungpur telok balala tali kümyonga aoba nokdangtsü atema tenangzükba agütsüogo aser "Alliance of Sahel States" ta nüngja agütsür lokti tentet tasen ka tentetogo.

Linük asem yagi France den military tesendaktep ajak aginogo. Linük asemprongla ya France indang colony liasü.

Mapang ka nungbo Sahel tesem nung France ya kanga tongtibang liasü, saka military-i sorkartem atsüంగా sülen item linüktem nungi parnok idang military agintsü asoshi telemtetba agiba sangdongogo.

Linük asem nungi France nungeri sepaitem atsüంగా nung aser rongsenketzüంగా mejungi aliba mapang ka nung tenokdangba balala agütsüba ajanga South len tzüküm nung kanga junga amenoker aliba linük Ghana, Togo, Benin aser Ivory Coast nungeri telungpur teloktem ya prokshia aotsü akok ta tsüba bilemer.

2023 küm mezüంగాbuba ita trok nung Africa anüolen telungpur teloktemi tesem 1,800 dak tema maka liasü aser iba mapang nisung 4,600 shi tepset aser iba ajanga nüburtem asoshi timtem tekangshi tulu bener arutsü.

ECOWAS regional ketdangsür kati ashiba agi, iba ya security dak sendakba nung mepetmesü adokba shilem tila ka dang lir.

Maldives nung Opposition party tongtibai tir Muizzu agintsü asoshi benoktsü



Mohamed Muizzu

Male, Aenjeti/January 29 (Agencies): Maldives nung opposition party tongtiba Maldivian Democratic Party, shirnok Parliament nung majority lir, parnok tir Mohamed Muizzu anema impeachment motion ka benoktsü renema lir, ta local media sangdong balala ajanga Hombarnü metetdaksü.

MDP MP kati Hombarnü Sun.mv dang ashiba agi, MDP

den Democrats temi impeachment motion benoktsü atema nübu peria anidenogo. Opposition party-i tang tashi Parliament nung impeachment motion mebenoki lir.

Honibarnü pro-government party, People's National Congress (PNC) aser Progressive Party of Maldives (PPM) nungi MP temi Speakers anema nokdaka Maldives

Parliament nung mepetmesü adokba sülen anogo ka lir tang iba osang ya metetdaksüogo.

Maldives nung amendaker aliba news portal Adhahdhu-i ashiba agi, MDP aser Democrats narpongla nungi züంగాsem 34-i tir mapa nungi anentsütsü atema benoktsü pusemba lemsatepogo.

Tir Mohamed Muizzu indang cabinet nung minister ka shimba agizüktsü atema parliamentary dang temelaba meshitsü asoshi special session ka ayongzükba agiba mapang mepetmesü adoka liasü. Minister tem rongnung Ahmed Usham, attorney general; Mohamed Saeed, economic minister; Dr. Ali Haidar, housing minister; aser Dr. Mohamed Shaheem Ali Saeed, Islamic minister nung densema liasü.

Sun.mv-i ashiba agi, Maldives Parliament-i tawa standing orders yanglushiogo aser iba ajanga impeachment motion benoktsü atema MP tem

asoshi mapa tezübaba kümdaktsüogo. MDP aser Democrats na senteper MP 56 lir, kong MDP MP 43 aser Democrats MP 13 densema lir.

Maldives' Constitution aser Parliament standing orders ajanga tir ya vote 56 ngura mapa nungi agintettsü ta shia lir.

Deobarnü PNC aser PPM-i Speaker Mohamed Aslam aser Deputy Speaker Ahmed Saleem na anema no-confidence motion benokogo. Tenaprongla ya MDP nungi lir. MP 23-i iba motion ya pusema liasü.

Dobarnü Parliament nung mangatettep adokba mapang Kanditheemu MP Abdulla Shaheem Abdul Hakeem Shaheem aser Kendhikulhudhoo MP Ahmed Easa na raratep tenzük aser Shaheem alanga tekolak yirua liasü. Minority lenir Moosa Siraj-i bendangtsütsü meranga liasü. Iba sülen Shaheem ya mozükidangi anir ao.

7buba KSON asayamung tembangogo



7th KSON asayamung nung takoker aser BDO Ahthibung Block, Peren, Noklen Jamir den külemi agiba noksa.

Dimapur, Aenjeti/January 29 (TYO): 7buba Kuki Students' Organisation, Nagaland (KSON) asayamung January 27 nü tembangogo.

Iba asayamung ya Peren District kübok Khelma-Sailhem yimtsüing nung "Progressing Together" omen nung ajemdaker asaya liasü.

Asayamung shibangba sentong nung Managing Director, Singvung Construction & Infrastructure Pvt. Ltd, L. Alex alaktetaa jaoker liasü aser BDO

Ahthibung Block, Peren, Noklen Jamir tetushi tejaoker liasü.

Iba asayamung nung Ahthibung YSU Overall Champion liasü. Parnoki gold medal 5, silver 2 aser Bronze medal ka ngua liasü. Asayamung nung Best Discipline Unit naroküm Pellhang YSU nem agüja liasü.

Maneni asayamung nung football asaya nung Lilen YSU aser Bungsang YSU na kanga toktepa asayar tie break asayaba sülen Lilen YSU-i

takok ngua liasü.

Teburtem volleyball asaya taküm agi küm pezübuba atonga Bungsang YSU-i kokogo. Final asaya nung parnoki Molvom YSU koka liasü.

Tetsürtem volleyball asaya Ahthibung YSU-i kokogo. Final asaya nung parnoki Vongkithem YSU koka liasü.

Asayamung nung takok angurtem nem alakteta jaoker, tetushi tejaoker aser tanga ketdangsürtemi sempet aser takok marok agüja liasü.

ISSF World Cup: Divyansh Singh Panwar-i gold medal nuogo

Aenjeti/January 29, 2023 (Agencies): India nunger Olympian Divyansh Singh Panwar-i, Deobarnü ISSF World Cup nung tebur 10m air rifle asaya nung gold medal anguba den otsü tasen ka yangluogo. Iba asayamung nung India team-i tang tashi nung gold medal ana ngur lir.

Egypt International Olympic City Shooting nung arishi küm 21 tain asayar yagi point 253.7 ngua taoba küm Hangzhou nung Asian Games asayaba mapang China nunger asayar Sheng Lihao-i point 253.3 ngua otsü tasen yanglur aliba ajatetogo.

Divyansh-i tetenzük nungi kanga junga asaya aser qualification nunga pai point 632.4 ngua pa temaba jenjang nung liasü aser tatembangbuba shot 24 nunga pai kanga junga



asaya-a silver medal angusang Italy nunger asayar Dani Sollazo dang nungi point 1.0 agi tejakdang liasü.

Pai asaya tepeyong 10 dak tekübok khen danga makha aser shot pezübuba aser trokbuba nung perfect 10.9s ngua liasü.

"Mapang talangka lir gold medal anguba atema ni kanga pelar. Ni tawa junga asaya arudar ajisüaka medal

monguteti aruogo. Iba ajanga küm tongtibang ka nung ni kü sasa dak tali temulung lemteta kümdaktsütsü," ta Divyansh-i asaya akokba sülen ashi.

Iba asaya nung Serbia nunger asayar Lazar Kovacevic-i bronze angu aser India nungersa Arjun Babuta trokbuba nung tembanga liasü.

Iba gold medal densema Divyansh-i world cup stage nung gold medal pongububa ngutetogo aser kija asaya nung tanabuba gold ngutetogo. Pai tatemsa kija asaya nung 2019 küm Putian nung gold medal ka ngur liasü.

Olympic asayatsü aliba küm mezüingbuba ISSF World Cup stage nung India team-i gold ana aser silver medal ana ngua tang tashi nungbo parnok temaba jenjang nung lir.



Nagaland nungi Sepaktakraw asayar 4 aser coach ka Indian Sepaktakraw team tenüing nung 5buba Asian Sepaktakraw championship nung asayatsü, koba January 30 nung February 3 tashi Kathmandu, Nepal nung asayatsü lir. Asayartem: Menenu Tsükrü, Sezovelu Dozo, Seyiekhrieno Tapa, Rukuvinu Tsükrü aser Holshe khrieno Indian team coach.

Indian Davis Cup Team atema security akangshitsüogo

Aenjeti/January 29, 2024 (Agencies): India aser Pakistan na Davis Cup asayatsü asoshi India team Deobarnü Islamabad tongaogo. Pakistan semdangba mapang multi-layer security arrangement nung shilem ka ama team lendong nungi jenboa toktsütsü atema bomb disposal squad kati anepdang shia Islamabad Sports Complex meita aotsü aser escort gari anati India team meiner senzütsü, koba yimya agi Head of State nem dang agütsür.

India tennis team küm 60 nung tang mezüingbuba Pakistan nung asayatsü atema ogo aser Pakistan Tennis Federation (PTF)-i security dak sendakba nung kecha mepetmesü madokdaktsünür.

India nunger asayartem asayaba tesem aser hotel nung dang timba alitsü, koba inyaksangshi mesademba ka asütsü saka iba ajanga parnok kümzüka alitsü.

International Tennis Federation (ITF)-i agizüker aliba sentong ka sülen PTF anidakdar.

"Küm 60 sülen India team Pakistan-i arua lir asünung onok tali kümdangshidar. India team

atema security layer pezü mesüra pongu agütsütsü. Event manager ka ama parnok senzüsenpongba mapang ni parnok den alitsü," ta PTF secretary general Col Gul Rehman-i PTI dang ashi.

India contingent nung asayar pongu, physio ana aser AITA ketdangsür ana densema lir aser parnok Deobar aonung Islamabad tongogo.

"Team senzüsenpongba mapang escort vans tem yoktsü aser parnok hotel-i VVIP entry ajanga aitsü, koba Head of State atema mekazüka tokja lir. Bomb disposal squad kati asayatsü aliba tesem anepdangshia meita aotsü aser iba tesem yagi shinga aittsü memelatsü.

"Islamabad ya Asia nung tekümzüka kübok aliba yimti rongnung ka lir, aser general election atonger asünung security akangshiatokogo. Air surveillance tenzüko aser yimti nung camera 10,000 shi tokja lir. India nunger asayartem kümzüka toktsütsü asoshi takokba tashi jenjang agitsü," ta pai ashi.

Pakistan Sports Board (PSB) team, Islamabad police, traffic police aser tanga ketdangsürtemi security achaayangtsü.

Ind vs Eng: Tanabuba test nung Jadeja & Rahul na masayatetsü

Aenjeti/January 29, 2024 (Agencies): India cricket team atema takoksa tulu ajurua Board of Control for Cricket in India-i sangdong ka ajanga February 2 nü nungi tenzüka Vizag nung England den tanabuba Test asaya nung Ravindra Jadeja aser KL Rahul na masayatetsü ta metetdaktsüogo.

Jadeja ya Hyderabad nung mezüingbuba Test asayaba mapang anogo 4buba nung hamstring yiruba ajanga masayatetsüsa kümogo aser kasa mapang nung Rahul-ia tetsüing tachichi len tebi nung tashiba ka aliba indang ashishia liasü, ta BCCI-i metetdaktsü.

Iba ya India team asoshi takoksa tulu asütsü, kechiyong India team nung tongtibang asayar Virat Kohli-a tanabuba test nung masayatetsüsa kümogo. Deobarnü Hyderabad nung Mezüingbuba test asaya India team-i run 28 agi mekoki liasü.

BCCI Medical Team-i asayar ana temang maneni asadangdar, ta Board-isa

shisem.

Asayar ana ya masayatetsüsa akümba sülen Men's Selection Committee-i team nung Sarfaraz Khan, Sourabh Kumar aser Washington Sundar nunger züingoksemogo.

February 1 nü nungi tenzüka Ahmedabad nung India A team England Lions den tasembuba aser tatembangbuba Test asaya atema Washington Sundar melena Saransh Jain shimogo.

Avesh Khan maneni Madhya Pradesh Ranji Trophy team nungi asaya atatsü aser nüngdakra pa team nung züingoksemtsü.

Tanabuba test atema

India team:

Rohit Sharma (C), Shubman Gill, Yashasvi Jaiswal, Shreyas Iyer, KS Bharat (WK), Dhruv Jurel (WK), Ravichandran Ashwin, Axar Patel, Kuldeep Yadav, Mohd. Siraj, Mukesh Kumar, Jasprit Bumrah (VC), Avesh Khan, Rajat Patidar, Sarfaraz Khan, Washington Sundar, Saurabh Kumar.

BILEMDANGANG

"Alirongsen kechaia tepela aser tesunep malizüktettsü."